

# Bleras perspectivas cun in studi en la hotellaria

Annatina Candrian

Avais vus era gia fatg stim da quest bel, grond edifizi a Passugg ch'ins vesa davent da Cuira? Là sa chatta la EHL, la scola Svizra per ospitalità e turissem. En Svizra datti pliras scolas per in studi en hotellaria ni gastronomia. Sez principal da l'EHL è a Lausanne, ma era Passugg è renumà sin il parchet internaziunal. Glied da tut il mund vegn ensemen per proseguir la medema finamira; lavurar in di en la branscha d'hotellaria ni gastronomia. A la scola inscuntr'ins persunas da l'Italia, l'Austria, la Frantscha e da pajais en l'Asia. Uschia han ins sco student/-a la schanza da furmar amicizias cun persunas da tut il mund.

La scola a Passugg porscha trais differents stgalims da scolaziun; l'emprendissadi da vegnir «Spezialist/-a da Communicaziun d'Hotel», in studi da «Management per l'Hotellaria» ed in bachelor en il rom «Management d'Ospitalità Internaziunal». La scola ha circa 250 scolar e scolaras, perquai è la scola pli famigliara che las grondas universitads en Svizra. Cun il temp enconusch'ins las fatschas en la scola e cun ils scolasts/las scolastas datti savens baterladas spontanias suenter las lecziuns.

Questa stad cumenz'jau cun il segund semester en il studi da «Management per l'Hotellaria». Durant il studi han ins d'absolver dus giadas in praticum che cuzza mintgamai in semester. L'emprim praticum sto esser en in hotel en Svizra. La spezialisaziun, quai vul dir cuschinunz/-a, recepciunist/-a ni agid da service pon ils students eleger sez. Cun quels praticums survegn ins la pussaivladad da metter la teoria en la pratica. Plinavant emprend'ins d'enconuscher nova glied ed ha la schanza d'entrar en contact cun hoteliers/hotellieras, tge che savess esser in grond avantatg per il futur. Il segund praticum dastg'ins far nua ch'ins vul; quai munta er en l'exteriur. Bler students/studentas van en direcziun da l'Indonesia u Engalterra.

Suenter il studi èn bleras portas avertas per entrar en il mund da lavur. I dat plazzas da lavur en Svizra, ma er en l'exteriur, i dat jobs cun gronda responsabladad en ina posiziun da management ma era plazzas davos las culissas d'in hotel. Dentant na dovran betg mo hotels absolvents/-as da quest studi, mabain era ospitals u firmas grondas èn leds da chattar persunas spezialisadas en questa branscha.

I dat bleras raschuns pertge che jau ma sun decidida dad ir en la scola a Passugg. Sco emprim è l'ambient famigliar fitg impurtant per mai. In auter factur che m'ha persvadì è ch'ins po ir a lavurar en l'hotellaria u la gastronomia sin l'entir mund cun il diplom da management. Plinavant emprend'jau d'enconuscher diversas culturas sin il campus da la scola, quai che jau chat fitg interessant ed enritgint. Jau m'allegr da far ils praticums e sun spanegiada en tge posiziun che jau vegn a lavurar in di.

## **Ils «zulprins»**

Ils «zulprins», uschia sa numna la rubrica per auturas ed auturs giuvens, ina rubrica che cumpara en collavuraziun da la GiuRu Juventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvens. Ils «zulprins» duain damai far qua u là sbrinzlas! Dapli infurmaziuns davart la GiuRu sin [www.giuru.ch](http://www.giuru.ch) ubain via mail a [giuru@giuru.ch](mailto:giuru@giuru.ch).